

Asrama pelajar UniMAP terbakar dapat perhatian perdana menteri

Mei 14, 2024 @ 10:48pm



Motosikal penuntut UniMAP di parkir asrama lelaki di Pauh, terbakar. - Foto BH

ARAU: Nasib pelajar yang terkesan susulan kebakaran aras bawah Blok B Kompleks Perumahan Pauh Putra Universiti Malaysia Perlis (UniMAP) di sini pada awal pagi Sabtu lalu, mendapat perhatian Perdana Menteri Datuk Seri Anwar Ibrahim hari ini.

Pengetua kompleks berkenaan Mohd Syamril Akhmar Chek Kassim, berkata pihaknya amat berbesar hati atas keprihatinan Anwar yang juga Menteri Kewangan, yang menyampaikan sumbangan wang tunai kepada 36 pelajar selepas motosikal mereka rosak akibat kebakaran itu.

Mohd Syamil Akhmar berkata, sumbangan berkenaan disampaikan oleh Setiausaha Politik Menteri Kewangan, Muhammad Kamil Abdul Munim yang meninjau tempat kejadian hari ini.

"Lapan pelajar menerima sumbangan hari ini, manakala selebihnya akan diberi kemudian kerana mereka telah pulang ke rumah masing-masing," katanya.

Beliau berkata, seramai 564 pelajar terjejas akibat kebakaran itu dan anggaran kos membaik-pulih bangunan yang terjejas belum diputuskan.

Pada 11 Mei lalu, media melaporkan 26 motosikal musnah dan 10 lagi mengalami kerosakan kecil selepas kawasan parkir asrama lelaki UniMAP itu terbakar pada awal pagi.

Ketua Polis Daerah Arau Supt Ahmad Mohsin Md Rodi dipetik sebagai berkata pihaknya menerima maklumat mengenai kejadian itu pada 4.43 pagi.

– BERNAMA